



наведи телефон


Лүимә СЭрипос

10.06.2021
№ 11 (1245)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



**Лүпта Этпос бвыл хөталэ
мә янытыл нъяврамыт ўргалан хөтал блыс**

В. Узель вәрүм хури

**Ты
номерт
ловиньтэн:**

Мә-вит ўргалан
мәгыс сәв
рүпата вәрәве

▶ 3

Сосса нъяврамыт
йильпи маснутыл
ос мўйлупсал
ёвтавет

▶ 5

«Ворщик хөтал»
янытлавес

▶ 7

Пуксиков рўт
урыл потыр

▶ 8-9

Пёс порат бньщым
сагыт урыл

▶ 12-13

Сакв я вәтат
ўнлын ялпыңкол

▶ 14

Лүпта Этпос бвыл хөталэ мә янытыл блнэ нъяврамыт ўргалан хөталыг блы.
Ты кастыл Ханты-Мансийск ўст «Төрүм Маа» музейт ялпың хөтал вәрыглавес.
Ты урыл потыр 7 лөпсыт ловиньтэн.

Сәв агит ос пыгыт элаль ханищтахтуңкве патэгыт



А.А. Дренин

Россия янытыл 11 класс а́стлам нъяврамыт яңк нәтнэ этпос 31 хөталэт химия, география ос литература ЕГЭ хассыт. Мән округувт ты тәл манасәвит агит, пыгыт школа а́стласыт, хоты экзаменыт хансэгыт ос сәв мөт вәрмалит урыл ханищтап ос мәнлат хөтпат вәрмалыныл щирыл рупитан округ департамент колт пуңкотнэ хум Алексей Дренин потыртас.

Күщай хум ләвыс, мән округувт 19 сөтыра арыгкем нъяврамыт 9 класс ань а́стласыт. Тән яңк нәтнэ этпос оигпам элы-пәлт кит экзаменыл вәрыглавәсыт. Ань ты накт аттестат-нэпакыл тах мивет.

11 сөтыра 500 нъяврамыт 11 класс ань ты а́стласыт. Тән халанылт 10 сөтыра 600 арыгкем элумхөлас ЕГЭ тах хансэгыт. Элаль вузыт ханищтахтуңкве кәсащан нъяврамыт туп тән экзаменыл ань вәравет. Мән округувт школа а́стлам 900 арыгкем мәнлат агит ос пыгыт элаль вузыт ханищтахтуңкве ат таңхәгыт, ты экзаменыт хансүңкве ат патэгыт.

Мөлты тәл корона-вирус агм мәгсыл ЕГЭ бөйттур этпост вәрыгла-

вавет. Ты элы-пәлт руш ләтың ос математика пуссын хассыт. Ань туп руш ләтың хансүңкве эрыс. Математика та нъяврамыт хансэгыт, хотыотн элаль ханищтахтан мәгсыл тах эрмыгылы.

Алексей Дренин китыглавес, хоты экзамен сәв нъяврамыт хансүңкве патэгыт. Тав ләвыс, ань сәв мәхум обществознание хансэгыт. Ат сөтыра 400 мәнлат хөтпат математика экзаменыл вәравет. Мощчанув нъяврам биология, химия, физика хансүңкве ёхталэгыт. Юи-бөвил тәлыт информатика бс хансэгыт, ты тәл кит сөтыра арыгкем агит ос пыгыт ты экзаменын вөвавет.

Сөрни пөс 2021 тәлт хумус нъяврамыт мивет, ляххал тотнэ хөтпат бс пүмщалахтасыт. Күщай хум ләвыс, мөлты тәл ЕГЭ бөйттур этпост бөлыс. Ос ёмащакв ханищтахтан агит, пыгыт лүпта этпос экзаменыт тәл сөрни пөсыл майвөсыт. Төнт сәв

нъяврамыт тамле сөрни пөс висыт. Ань школа а́стлам мәнлат хөтпат бөвлэт ЕГЭ хансэгыт: руш ләтың 75 балл ос кит мөт предметыг 70 балл сәвнүв ке хансэгыт, туп төнт сөрни пөсыл тах мивет.

Округ янытыл сәв мәнщи, ханты ос ёрн нъяврамыт школа ань бс а́стласыт. Тән халанылт сәв агит, пыгыт элаль ханищтахтуңкве номсэгыт.

Сосса мәхум мәгсыл «региональный перечень профессий» нампа нэпак пирмайтавес. Мәнщи, ханты ос ёрн щөмьят ты урыл вәгыт ман ати, Алексей Дренин тох ләвыс:

– Ты нэпак 2019 тәлт пирмайтавес. Ань 9-11 классыт а́стлам агит ос пыгыт ты нэпак щирыл элаль ханищтахтуңкве вөрмөгыт. Ос ханищтахтанэныл мәгсыл олн тәнки ке бөйтэгыт, олнаныл ювле ойтыянув.

Нэпак ищхыпың утыт департаментув лөпсыт ёмащакв ловиньтаңкве рөви. Ты вәрмалы урыл сәвнүв мәхум вос вәгыт, мән мән пәвылквет бленэ школат ёт акваг рупитэв, ты нэпак тув кәтэв, агиррищит, пыгрищит тәнки эрнэ профессия вос пөриегыт.

Мән округув янытыл ань 9 класс 656 сосса нъяврамыт а́стласыт, 11 класс – 343 агит, пыгыт. Тән пуссын «региональный перечень профессий» нампа нэпак щирыл элаль ханищтахтуңкве ань вөрмөгыт.



Хулюмсүнт пәвыл 11 классыт ханищтахтам нъяврамыт

Людмила ТЕТКИНА

Мә-вит үргалан мәгыс сәв рүпата вәрәве



Ищйпың мәтвим хуриг

С. В. Пикунов

Округувт «Спаси и сохрани» нампа мә-вит үргалан мирхал вәрмаль кәсың тәл вәрыглаве. Ты порат нәлоловхуйпловит щәс щәпитавес, руш щирыл «Живи в стиле ЭКО» намаявес.

Мәлал мә-вит үргалан департамент кол кұшай хум **Сергей Пикунов** ты кастыл ляххал тотнә колн әхталас. Округувт маныр рүпата вәрәве, тав ты урыл потыртас.

Мә янытыл мә-вит үргалан тәла хосыт ань вәт сәвсыр мероприятие щәпитавес. Мән ұсанувт ос пәвланувт акв сәтыра яныгсәт әрнә вәрмаль вәрәве. Ань мә-вит үргалан мәгыс сәвсыр касылыт щәпитавес.

Округувт мә-вәй ос газ мәныл нәх-винә атпан-кем сәвит компаният әрнә рүпата ос вәрәгыт. Тыт рүпитан мә-вит үргалан хәтпат, мирн нәтмил

вәрнә мәхум (волонтёрыт), общественный организацият, нәврамыт хаништан мәхум ос нәврамыт ты тәла вәрим сәвсыр щирыл нәтәгыт.

Ты хәталыт миннә порат мәньлат мәхум сәвсыр проектит тәстысыт. Лүпта әтпос бөвил хәтал-



Кина суссылтан фестиваль

ныл ос атыт хәталә мус Ханты-Мансийск ұст мә-вит үргалан урыл кинат суссылтавәсыт. Мән мәвт ос мөт хән мәтт мә-вит хумус үргалаве, ты тәла хосыт маныр рүпата вәрәве, тот тәра-паттаве тах.

Ань налыман нупыл сәт сәвсыр мәныл мәхум акван-нәтхатым мә-вит үргаләгыт. Кәсың тәлныл иң сәв мәныл мәхум акван-юрщхатәгыт.

Округувт «Спаси и сохрани» акция миннә порат, тыт мә-вит үргалым рүпитан мәньлат мәхум ХХ мирхал конференцияныл вәрыглаве. Тувыл школат хаништах-тын нәврамыт мәгыс мә-вит үргалан урыл «Красная книга глазами детей» кәсыл вәрәве. Ань ты касылн онтолов мөт хән мәныл ос нәлсәт нупыл кит Россия регионитныл нәврамыт тәнки рүпата-ныл кәтсаныл.

Ань ООН мөт хән мәт өлнә мирхал организация мә-вит үргалан вәрмаль лов тәлн элаль мәк яныг тәлаг тотуңкве ләвсаныл. Ты тәл Россия коньпал Египет, Италия, Германия, Эстония, Молдова, Беларусь, Украина, Казахстан, Узбекистан мәт пуссын аквьәт хәтсәт сәтыра элумхәлас мә-вит үргалан мәгыс акван-нәтхатым рүпитәгыт.

Мә-вит үргалан вәрмаль бөвилтыма пәсныл округувт сәтлов нупыл сәт мә-вит үргалан мәт (природоохранный заповедникыт) щәпитавәсыт. Ань мә-вит үргалым ат млн. арыгтем элумхәлас нәтмил вәрәгыт. Пуссын аквьәт 87 мөт хән мәтт өлнә мир, Россият ос 72 регионитт өлнә мәхум аквьәт рүпитәгыт.

Ань ты вәрмаль лүпта әтпос аквхуйпловит хәталә мус минуңкве паты. Ты хәталыт сыс округувт өлнә ұсанув ос пәвланув ұсхулыт хот-сыстамтавет, порсыт хот-атавет. Тувыл ййвыт, хорамың лүптат ұнттавет ос мөт әрнә рүпатат тах вәрәвет.

Николай МЕРОВ



Ййвыт ұнттум мәньлат әгит-пыгыт

Вөрүв ёмашакв үргалаве

Най харыгтан хөтпат яныгпöль этпос ват нупыл хурмит хөталныл мавит уральтым яласаңкве бвылтахтасыт. Та пасныл округув атпан савиткем най тэнэ ма блыс. Пуссын аквьёт кит сөтыра атсаткем гектар ма найн тайвес. Яңк нятнэ этпос оигпан мус тән пуссын лапхарыгтавёсыт.

Ты урыл потыртан магыс МЧС кұщай хум **Пётр Кугуй**, ма-вит үргалан департамент кұщай ваңын хум **Егор Збродин**, авиабаза кұщай **Иван Швецов** ос «Природнадзор Югры» кұщай **Андрей Кушков** ляххал тотнэ колн ёхталасыт.

Тән ты урыл тох потыртасыт. Округув янытыл вөрүв уральтым товлыңхәпыт ос вертолётыв вәтихал яласэгыт. Ос аварийно-спасательный службат ма-вит уральтым оныцияныл. Хотьютыт аренда щирыл ма-лөмт оныщөгыт ос ма-щунь маныл нөх-винэ мят рүпитэгыт, тән вөр акваг уральтаңкве лаввёсыт.

Ань най харыгтан магыс ұсытт, павлытт молях акван-атхатнэ хөтпат, казак-мәхум ос щёпитахтым өлэгыт. Ты мәхум вөр нөх-пёламланэтэ порат пуссын акван-нётхатым най лап-харыгтэгыт.

Матахмат тәл ювле хультум порат, округувт ма-вит янытэт уральтан магыс округ кұщаянүв «Ясень» ос «Рослесхоз» намба ищхыпың утыг ёвтсыт. Ты хосыт округув мятэ янытэт нумыл интернет щирыл сунсаве.

Хөт най тэнэ ма кәсалаве, най харыгтан мәхум тәра тув кётавет.

Тувил аньтовлыңхәпыт онтоловхуйплов савит лёххясыт хосыт мав уральтэгыт. Ты лёххясыт онтолов сөтыра савит вёрыста палытаныл, тән нумыл ма-витув янытэт сунсыяныл.

Кұщай хөтпат лавманыл щирыл, округувт атпан савит най тэнэ мят халт хурумхуйплов мят мәхум най нөх-пёламтасыт. Мөт мят ос щахыл сәлайлнэ паттат вөр нөх-пёламлас.



Октябрьский район Малый Атлым павыл пөхыт акв хум матыр вәриматэ вөр нөх-пёламтастэ. Ты най вөр хосыт минас, павылн ёхтыс. Тот ампарыт ос акв өлнэ кол найн ёсвёсыт. Ань тав полициян хөнтвес, ты бвыл вәрме магыс сутытаңкве тах патаве.



Ищхыпың мят вим хурииг

Вөр пёламтан порат, сут хосыт тамле уголовный вәрмалы щёпитым блы: хөтпа китсат манос атсат сөтыра савитыл штраф-олныл пинуңкве вёрмаве. Сутытан хөтпа тәра-паттытэ, тав ман яныт тәрвит вәрыс, та савит штрафыл та пинаве. Ты коныпал элумхөлас хурум манос нила тәлн турманколн унттуңкве вёрмаве.

Усыт ос павлыт ляпат

Яныгпöль ос яңк нятнэ кит этпосыг сыс хөтпан нупыл ат яңкылмат төсам пум найн тайвес. Ты хөталыт сыс ват арыгтем элумхөлас төсам пум нөх-пёламтыманыл паттат пуввёсыт. Тән ань хөтсат нупыл хурум сөтыра солкөви савит штрафолныл пинвёсыт.

Округув янытыл шар сав най Кондинский район пёламлалыс. Хөнтаң ма мортым ма нупыл блы, тот сартыннувег мälтыпыг ёмты. Савыңпälэ най тэнэ вәрмалы щәхыл кургын паттат ёмталас. Тот най харыгтан магыс мәхум хурум вертолётыв ос хурум мань товлыңхәпыл яласасыт.

Матьёмас тэнэ най павлыт мус ат ёхталас. Тән пуссын молях лапхарыгтавёсыт. Тыгыл элалы рёгың хөталыт ос ёмтэгыт тах. Най харыгтан хөтпат акваг уральтахтым өлэгыт.

Мәхумаквет, та яныт ёмас вәрён, вөрт аращ пälтнән элы-пälт өвлэт мувлахил мятэ порсыл хот-сыстамтэлын, тувыл ущ аращ пälтән. Ос ювле атхатнән порат, аращын ёмшакв лап-харыгтэлын, атиңк матыр бвыл ёмты. Вөрүв үргалым оныщелын.

Николай МЕРОВ

www.khanty-yasang.ru

Сосса нъяврамыт йильпи маснудыт ос мүйлупсал ёвтавет

Мән округут 2016 тәл пәсныл «Добрый югорчанин» намба акция нъяврамыт мағсыл вәрвес. Тамле эрнэ тәла ханты нэ Екатерина Жукова такви махманэ ёт вәри. Тав Нижневартовск үст «Югра лылыёп» отделениятәт күщаиг блы ос «Хунзи» намба общинат пунқототы. Сосса нъяврамыт хумус нётыяныл, Екатерина Жукова таи потыртас:

– Ты рупата мән ат арыгкем тәл вәрёв. 2021 тәл яныгпөль этпост Нягань үст, Октябрьский ос Хальүс районыгт өлнэ сосса махум йильпи маснудыт кётсанүв. Манасәвит щёмьят ос нъяврамыт акцияв щирыл нётсанув, тәл оигпан элы-пәлт тах ловиньтэв.

2016 тәлт мән, финно-угор мәнәлат махум, сапрәнин Ханты-Мансийск үст акван-атхатыгласүв ос сәвсыр тәрвитуң вәрмалит урыл тот потыртасүв. Төнт сосса нъяврамыт урыл потыр өс блыс. Ты элы-пәлт интернатит өлнэ агиришит-пыгришит маснудыт ёвтыглавёсыт, оманыл-әтяныл ты урыл номсуңкве сака ат эрыс.

Ань маснудыт нас тох воссыг ат мивет. Нъявраманыл яныгмёгыт, онтолов этпос сыс интернатит блым, төва маснуданыл молях мәниг ёмтэгыт. Оманыл-әтяныл мән пәвылквет ос пёс йис мят өлэгыт, ләпкан вәтихал ялантаңкве сака өс ат вёрмёгыт. Тыммагсыл мән ты щёмьятын нётуңкве вуйхатсүв.

Өвлэт туп Нижневартовский районт өлнэ махум ёт рупитасув ос предприниматель-хөтпат ты эрнэ рупата мән ётув вәруңкве вөвсанүв.

Тән йильпи маснудыт ёвтсыт, мән ос элаль интернатит тотсанүв, нъяврамытын тот мисанув.

Сәвсыр пәвлытыт ос ұсытыт өлнэ ёмас, сымың махманув мәнәвн нётуңкве өс патсыт. Ань нусаг өлнэ щёмьят ос интернатит өлнэ нъяврамыт йильпи маснудыт тотыянүв.

Мән предприниматель-хөтпаныл нётмил хунь вөвёв, тәра ләвёв, мәнәвн олт шар ат эри. Маснуд тәнки вост ёвтэгыт, мән элаль нъяврамыт палт тотыянүв. Ань мән ётув районный миркол күщаит рупитэгыт. Округ Дума

депутатит сосса махумн ос сәвсыр эрнэ пормасыт, маснуд ёвтыглэгыт.

Округ күщай нэ Наталья Комарова ты эрнэ тәла урыл өс вәг, ищхйпың утыт такви лөпсәт мән вәрум рупатав урыл хансыглас ос сосса нъяврамытын нётуңкве махум вөвсанэ.

Юи-өвыл тәлыт сыс мән округут өлнэ 300 сосса щёмьят нётсанүв. Төнт 800 элумхөлас йильпи маснудыт, порма-

сыл тотсанүв.

Кәсың тәл мән нъяврамыт Йильпи тәл ёхтын элы-пәлт мүйлупсал мүйлуптыянүв. Ты элы-пәлт сәвсыр күщаитн, организациятн пищмат кётэв ос интернатит өлнэ сосса нъяврамытын мүйлупсат ёвтуңкве вөвиянүв. Ты пора сыс сәв агиришит ос пыгришит ёнгынутыл ос мөт ёмас мүйлупсал тотыгласанүв.

Екатерина ләвыс, өвлэт тән туп интернатит өлнэ нъяврамыт нётыяныл, ань нусаг өлнэ сосса щёмьят маснудыт өс нётыяныл. Ханты нэ мән газетав хосыт тән ётаныл рупитан предприниматель-хөтпатн, сәвсыр күщаитн, ма-вөй нөх-винэ компаниятн нётмил вәрнэныл мағсыл яныг пұмащипа ләтың ләви.

Екатерина Жукова ос тав ётэ рупитан махманэ яныг, эрнэ рупата вәрёгыт. Нъяврамыт йильпи маснудыт, мүйлупсал ёвтыяныл ос тыщирыл сәв щәгт тәнанылн тотэгыт.



Колтагыл мүйлупсал майвёсыт



Е. Жукова хурягә

Е. Жукова

Людмила ТЕТКИНА

Вөрүит уральтым ӧньщавет

Хус тӕл ювле хульгум порат Ханты-Мансийск ӱсн мӕнь пупӕпщикве тотвес. 2001 тӕлт вӧрт тав ос тав ӕпщитӕ хӧнтвесыг, щӕнӕн кӕтн-паттыма. Акватӕ Ханты-Мансийск ӱсн тотвес, мӧтанӕ - Нижневартовск ӱсн.

Тав Ханты-Мансийск ӱс лятат унлын Шапша нампа пӕвылн тотвес. Тот сӕвсыр вӧруит, товлың уит ӧньщавет, та мӕ рущ лӕтңыл тох лӕваве – эколого-просветительский центр «Шапшинское урочище». Тув тотым ты пупӕпщикве Ищтапан намыл пинвес.

Та пӕсныл таве акв нӕ уральты, наме **Вера Николаевна Перевозкина**. Вера Николаевна Шапша пӕвылт ӧщнӕ вӧруит, товлың уит пуссын уральтыянӕ, ӕрнӕ порат пусмалтыянӕ. Рупататӕ урыл тав тох потыртас:

–Ам ты центр рупитанқв ӧвылтахтаме пӕсныл Шапша пӕвылт рупитӕгум. Вӧруит, товлың уит ос мӧт сӕвсыр ӱйхулыт тыттыяну, уральтыяну. Кӕсыңаныл мӕгсыл мӕн ӕнас тӕнут щӕпитӕв.

Ты тӕл мирколныл сӕвнув олныл майвесӱв – 1 млн 400 сӧтыра солкӧви. Мӧлты тӕл мощщанув ӧлыс. Ты олнытыл тӕнутыл ӧвтыянув, пусмалтыянув. Мӕнавн ӱст рупитан ветеринар-лӕккарыт нӕтӕгыт, вӧруит пусмалтан мӕгыс олн ат выгыт.

Ань Шапшат ты вӧруит ос товлың уит ӧньщиянӱв: хурум пупӕпщи – щар яныг Ищтапан, тувыл



В.Н. Перевозкина

Еремей ос Тихон, енот хурип ӕмп, ӕж, хотаң, ӱсвой, халӕв ос ӱринӕква. Юн ӧщнӕ ӱйхулыт тот ӧс ӧлӕгыт – тит лувыг, сӕмыл охсарыт, коза, кроликыт, пурщ, щижурекеыт ос мӧт сӕвсыр уит.

Тӧват ӧс мори капыртӕгыт. Акв порат пупӕпщикве шина тйврын щалтыс, пукитӕтыл та утн тагапас. Матах хӧтал та рӧнхыс, мӕн МЧС мӕхум вӧвсанув, вос нӕтӕгыт. Тӕн ювле лӕвсыт, мӕн таве туп кӕтн-паттуңк вӕрмилув. Тувыл тӕрпиң



Сӕмыл охсар

укол хӧнтсӱв, пупӕпщикве сгущенка банкал ляпан вӧвыслӱв, уколыл та тӱщтыслум. Матах кум сыс та шинатӕ хот-вислӱв. Такви ӧс сака хот-рохтыс.

Хотаң урыл нӕ ӧс пӱмыщ потыртас. Вӧраян мӕхум хотаң хӧнтсыт, тав товлӕ матаре ӕмтыс, тыламлаңкв щар ат вӕрмыс. Шапшан тотвес, тот пусмалтавес ос ювле ӕ вӕтан та тотвес, мӧт мӕн вос тыламлы. Сӕтахтем хӧтал минас, Шапшан ӧста тотвес. Мӕхум лӕвӕгыт, щар ӕлмхӧлас ляпан юв,

хӧтпаныл щар ат пилы, ӕмпытн ул вос пураве. Ань тох ӕлаль Шапша пӕвылт та ӧньщаве.

Вера Николаевна сӕв пӱмыщ потыр потыртас, сака потрың нӕкве. Тӕн тот ӧщнӕ козат посыяныл, та щаквит товлың уитн ос мӧт ӱйхулытн мыганыл.

Кӕсың тӱя Ищтапан нӧх-сӕйкаламе юи-пӕлт Шапша пӕвылт ялпың хӧтал вӕраве – «День рождения медведя Степана». Тув сӕв мир нявраманыл ӕт ӕхталӕгыт, хӧтал палыт тот мӱйлӕгыт. Тӕн ань пуссын вӕганыл, тув матыр атың тӕнут ӕт ӕхталаңкв ӕри – пупӕпщит мӕгсыл сгущенка тотуңк ӕри, морковь, яблокат – тамле тӕнут тӕн тӕнқв сака кӕсӕщӕгыт.

Ань титыт тӕл ты ялпың хӧтал ат вӕрыглавес. Ӱст ӧлнӕ мир сака кос ӱрхатасыт, няврамыт Шапшан ӧс сака вӧвхатӕгыт. Таквсы мӕнь таквс ӕтпост ул вӕраве.



Шапша пӕвыл

Валентина ВАСИЛЬЕВА

«Ворщик хөтал» янытлавес



Ворщик хуритэ



Ханты аги



Агиришквет ййквашлэгыт

Пёс йис пораныл Хөнтаң (Кондинский) районт блнэ мәншицт Ворщик хөтал янытласыт. Ты товлың үйрищ тән ялпыңыг лавыгласаныл. Ос мән маҕсылув ты бс нас үйрищ хунь. Хальүс район Нёрыт ляпат Мәнья павыл үнлыс, та павыл Най-Отыраныл Ворщик блыс.

Ань ты лүпта этпос бвыл хөталэт ма янытыл няврамыт үргалан мирхал ялпың хөталт Ханты-Мансийск үст «Төрүм Маа» музейт «Ворщик хөтал» янытлавес. Тув үст блнэ сав няврамыт оманыл-атяныл эт ёхталасыт. Тән маҕсыланыл савсыр пумыщ тот щёпитым блыс.

Өвлэт няврамыт маҕыс «Хөтал» нампат театрыт рүпитан хөтпат эргын ос ййквнэ кан щёпиталсыт. Ворщик манрыг янытлаве, та урыл потыртасыт. Пупапшитев урыл акв мөйт суссылтасыт, ос та мөйтыт Ворщик тавёныл номтыңнуев ос ёрнуев блы, полям яңк молях такви лэгётыл сакватастэ.

Мән ньврамаквет ййквуңк вөвыглавёсыт, тән вос суссылтэгыт,

Ворщик тыгле-тувле хумус поргащлы, хумус ййквашлы. Няврамаквет татем касащим ййквсыт, оманыл-атяныл тән ётаныл тыгле-тувле бс ёңхатахтыгласыт.

Тувыл савсыр товлың

уит урыл амшит амщувёсыт, ёл-хансым турсуяныл щирыл ювле лавуңк эрыс, хоты товлың үй ань рөңхи.

Муйлын кант савсыр мāt пасаныт люльсыт, тот Ворщик хуритэ сас-ломт тармыл манос мән йивохса тармыл пöслуңк рөвыс, рущ лātңыл тамле хурит «оберегыг» лававет. Пöслыманыл юи-палт ньврамакветн Ворщик хуритэ ёт-виңкв рөвыс.

Пёс порат тарыг паквныл акань хумус вәрвес, **Надежда Коновалова**

ань суссылтас. Ханты нэкве сав тал музейт рүпиты, пёс накыт ос пёс вәрмалит ёмащакв вәганэ. Тав ань лавыс, пёс порат нэ моляхнув няврамыңыг вос ёмты, ёныпе тавён паквныл акань вәрыглас ос пүтыска ёлы-палн пиныгластэ. Тувыл нэкве тара тәрвитыңыщ та ёмталас. Тамле ты пумыщ пёс йис вәрмалит няврамытн ань потыртавёсыт ос суссылтавёсыт.

Ты ялпың хөталн ёх-талам няврамаквет щагтым тыгле-тувле татем та хайтыгтасыт, касащим хөт-ати матыр та мащтырласыт. Тәнанылн, соль, сака пумыщ тот блыс.

Матьёмас, ты пёс ялпың хөтал ань нөх-вөрмалтавес. Мән «Ворщик хөтал» ат кос янытласув, ос ань яныгман няврамыт тыщирыл муйлым мән пёс йис вәрмалянув, пёс йис наканув вәңкве патяныл. Мәншицт мир пёс блупса элалы тах тотяныл.



Акань вәрёгыт

Валентина ХОЗУМОВА

Пуксиков рӯт урыл потыр

Пёс йис пора тәгыл Пуксиковыт колтәгланыл ёт Хулюмсүнт пәвылт өлэгыт. Ань та пәвылт өлнэ Пуксиковыт халт Галина Николаевна Бушуева, такви бпарищ наме Пуксикова, шар яныг хөтпаг ылы. Тав уретыл №10 мәнщи газетат ам яныг потыр хансыгласум. Галина Николаевна рутанэ урыл потре ань элаль мины:

– Ам атям **Николай Сергеевич Пуксиков** Хулюмсүнт пәвылт самын патыс, тыт яныгмас. Тән щёмьяныл яныг ылыс, сәв нйврам. Атям тән халанылт шар мәнниг ылыс. Школат нила класс мус хаништахтас, ома тәннётнэ мус ёмтыс, вбраянқве ос хул алышланқве патыс.

1943 тәлт янқ нәтнэ эппост хөнтлаңкве тотвес. Аквум потыртәлыс, атям тәланэ намыл яныг хасвёсыт. Военный нәпакёт самын паттум тәлэ 1926 тәлт ылыс. Кос атям 1928 тәлт самын патыс. Хөнтлым, Берлин мус ялыс. Война юи-пәлт армият лусытас, 1950 тәлт юв уш ёхтыс. 1952 тәлт омам ёт акван-минасыг. 1954 тәлт ам самын патсум. Мән щёмьявт сәт нйврам ылыс.

Хөнтламе мәгсыл, сәв пёсыл майлувес. Ётыл мәнщи ләтңыл хансум пищманэ ос ты пёсанэ пәрколт хөнтсанүв. Нәпаканэ ос пёсанэ Слава аңшим үргалым ань оныциянэ.

Ам яныгмам порат атям война урыл сака ат потыртәлас, амки ос сака ат китыглахтасум. Туп акв щёс мощ аялас, акв потыр потыртас. Ат торгамтаслум, ты вәрмаль война порат манос та юи-пәлт ылыс.

Тав товлыңхәпыт нөхтыламлан ос ёл-иснэ мәт рүпитас. Акв хөтал йтипәлаг товлыңхәпыт кургуңкве та патсыт, нөхтыламлаңкве щёпитахтасыт. Лёңхе ёмащакв вос нәңки, кит палыл нәйпёсыл вәрвес. Тувил илт-



Галина Николаевна атятә Н.С. Пуксиков. 1945 тәлт



Галина, 1972 тәлт

торыг нәйпёсыт лапхарыгласыт.

Атям хот-рохтыс, элаль маныр вәруңкве, өвлёт шар ат торгамтас. Номтыл ёхтувес, трибунал щирыл ань та сутытаве. Товлыңхәпыт иснэ мә, улпыл, ворт хөт ылыс, атям совыр лэс үнттуңкве тот ялантәлас. Совыр лэсыт кәрквәлгыг вәрсанэ. Ты лэсыл вәрим кәрквәлгыл нәйпёсыт ёмащакв молях вәрапасанэ, тән пуссын пәламласыт ос товлыңхәпыт элаль нөх-тыламлаңкве тәра та патсыт.

Атям каңке Гаврил хөнтлаңкве ос ялыс. Хулюмсүнт пәвылт щёмьятэ ёт ылыс. Яныгпәвылныл олум нәтэ ёт кит нйврам Татьяна ос Василий янмалтасыг. Тән сас тәнки щёмьяг өшсыг.

Татьяна ойкатэ Семён Самбиндалов ёт Усть-Маньят ылыс. Василий нәтэ ёт хурум нйврам Серёжа, Тәня ос Толя янмалтасыг. Серёжа ань колтәглыл Кульпас пәвылт ылы. Толя хосат Израиль мөт хөн мән олүңкве вәнтлас. Тәня школа юи-пәлт Пенза үст хаништахтас, тот ылыс. Тав ань атимыг ёмтыс, нйвраманэ тот өлэгыт. Серёжа тән ётаныл вәйхаты, тув ялантәлы.

Толя Израиль нупыл минаме юи-пәлт воссыг юв ат ёхталас, пищма ос ат хансыглас. Серёжа тәве акваг кинсытэ. Сәв щёс «Жди меня» нампә передача щирыл тәве хөнтүңкве таңхыстэ.

Акв порат Хулюмсүнт пәвылт өлнэ пыгн Ваня Пуксиковн Израиль хөн мәнныл нэ свонитас ос рутанэ урыл китыглахтас. Ваня мәннылат пыг, рутанэ



М.Т. Двинянинова ос Г.Н. Бушуева



Сергей Пуксиков нәтэ ёт

урыл сака сав ат ваг. Тонт ты нэ ам эшум Марина палт свонитас ос рутанэ урыл пумшалахтас.

Марина ос Ваня ищ-хйпың ут хосыт хонтсаге. Марина анумен ты урыл лавыс. Насати, Толя агитэ Израиль мот хон мат ань олы.

Ман тара Кульпасн Серёжа палт свонитасув. Серёжав сака щэгтыс, Толя нявраме та хонтхатас.

Агитэ наме Ника. Тав лавыс, аятэ атимыг емтыс, тот Израиль мат ёл-щёпитавес. Ника хум вэрыс, такви нявраманэ янмалты. Серёжа рутанэ палт Израиль нупыл 2020 талт ялуңкве кусыглас. Тувыл ты коронавирус агм магсыл тув ат минос.

Ника нявраманэ ёт Кульпасн ёхталаңкве ос вовсанэ. Мён Мариана ёт ищхйпың утыт Ника ос тав нявраманэ хуринэ суссанмён, тән шар маныщи хурипат. Пыге тай Гаврил нупыл сака харты.

Гаврил война юи-палт юв ёхтыс. Нэтэ ёт китыг-минос, манрыг тох емтыс, ам тай ат ваглум. Гаврил мот нэ тотыс ос Няхлаң павылн өлуңкве вантлас. Китыт нэтэ ёт нила няврам Петя, Лида, Дуся ос Сеня янмалтасыг.

Ман акв порат Кимкясуй павылн ялсүв ос Няхлаң павылн паг пухталасув. Павлың махум лавсыт, тот Гаврил пыге Сеня Пуксиков олыс. Тав атимыг емтыс, колэ хультыс. Тув шалтсасув, колкант тасавит хурит лакква-пахвтым олсыт. Та халт атам хуриянэ тот хонтсанүв ос ёт-висанүв. Атам хунь лусытас, Гаврил каңке палт такви хуриянэ кетыгласанэ.

Атам ос акв каңк оныщас, наме Павел. Тав уретыл сав ат вагум. Кит ушцияге Аксинья, Анна

Хулюмсунт павылт олсыг. Александра Няхщам-вольт колтаглэ ёт олыс. Анастасия ос Ягрим павылт похат, тот хот олыс.

Тонт махум Ас ян хул алышлаңкве кетыглавёсыт. Тав ос тув минос, тот хум вэрыс, Ендырев опарищ наме олыс. Ойка-тэнтыл кит няврам ошсыг.

Аквум Анастасия мань пыге Витя самын паттум порат атимыг емтыс, агитэ сат тал яныт олыс. Тох няврамыг савалапыг хультсыг. Атам уштитэ хунь атимыг емтыс, тэн омаатэ ёт тув минос. Ос Витя тэнки палтэн вистэн. Агитэ ёт виңкве



Анатолий Пуксиков ос нэтэ Ника агитэн ёт послым олэгыт



Ника нявраманэ ёт послым олы, Израиль

Ендыревыт ат касашасыт. Тав щакван ос атянэн янмалтавес. Витя ос ман палтув олыс.

Акв порат ам Ягрим павылт пүльницат хуясум. Тонт ам палтум нэ ёхталас. Ам тав нупылэ сунсэгум, хаштал нэ, ам таве шар ат ваглум. Амки иң манылат нэг олсум, сака эссамтасум, наме хумус аты китагласлум. Тав тара китыглахтуңкве патыс: «Наң Пуксикова, Хулюмсунт павылный олэгын?» Тонт тав потыр-

тас, тав иң мань няврамыг олыс, хунь омаатэ атимыг емтыс. Тав аятэ рутанэн янмалтавес. Витя апшитэ Хулюмсунт павылн Пуксиковыт омаатэ рутанэ палт тотвес, тот янмалтавес.

Ам ювле лавсум: «Ам Витя Ендырев ваглум, тав ман щемьят олыс. Тав школа юи-палт Усть-Манья павылт экспедицият рупитас. Нэ тотыглас, тувыл тэнки няврам ат ошсыг». Тох ляпа рутум ёт Ягрим павылт хонтха-

тыгласум, тувыл хумус наме аты китыгласлум.

Омам Няхлаң павыл-ный олыс. Акв порат Надя Лыткина анумен Саран-павылн ялуңкве вовыстэ. Лавыс, ляпа рутанум та павылт ос олэгыт. Омам акве Няхлаң павылт олыс, тувыл Саранпавылн вантлас, Анастасия наме. Та павылн ялмув порат тав ётэ ващиньтахтасув.

Анумен касаласт, такем щэгтыс. Ам омаатэ-атам урыл потыртаңкве кос патсум, тав ювле лавыс, ман щемьяв урыл пуссын ваг. Омагум-атагум хунь атимыг емтыс, ос апшиянумен, эщанум ёт амккем хумус хультсум. Омам акве Анастасия 97 талт мус олыс, 2016 талт атимыг емтыс. Омам ос акв каңк оныщас, Дима наме олыс.

Ам Галина Николаев-нан потре магсыл яныг пумащипа латың лавегум. Маныщи нэ такви рутанэ урыл сав ваг, хот ос хумус олэгыт, пумшалахты, такви рут махманэ ат ёрувляянэ. Ам тавён сав ёмас, сымың латың кетэгум. Пускәт, пуслагыл лавегум, Най-Отыранылн вос ургалаве.

Людмила ТЕТКИНА

Кәркам мәхум маттем та мәщтырласыт

Туяг Ханты-Мансийск үст блнэ «Төрүм Маа» музейт сакныл щаквцин ос ййвныл аны-сән ёргын ханищтап вәрыглавес. Тув атхатыглам мәхум ёт мощ потрамасум, кәтыл вәрнэ пормасаныл урыл китыглахтасум.

Сосса нэт сагыг

Рущ нэ **Светлана Александровна Харитоновна** Ханты-Мансийск үст хурит кәтыл пөслүм ойка В.А. Игошев музей-колэт рүпиты, нйврам галерея колнак тармыл пуңктоты. Тав сосса нэт өщнэ сагыг вәрыс, ты урыл тох потыртас:

– Ты музейт ам сәсныл апа вәрыгласум, тамле ханищтап аномн сака мұстыс. Ань тыг щәгтым йисум, вәглум, өс хотты пұмыщ тэла кәсалэгум, кәтыл матыр вәруңкве ханищтахтэгум.

Нэквет ёт хорамың сагыг вәрсум. Тамле сагыт

элнаң мәньщи ос ханты агит өщсыт. Тән ләвнэныл щирыл, тамле пормас үргалап мәгыс щөпитәлвес, нэ хөтпаныл лйоль самыл ул вос сунсавет. Овлэт сәтапытыл сагыг вәрсум, тувыл сагагум хорамың сәтапытыл (выгыр, вущрам ос атырхари) лап-пёрсаласагум, нуми пәланән сакыл йөнтсагум. Ты сака пұмыщ рупата.

Сосса нэквет хорамыт вәруңкве татем хәснэныл, матъемас пёс мәхманыл вәрыглам тэлат элалэ тотыяныл, мәнав ханищтыяныл. Ты сагагум ам Владимир Игошев музей-колән тотыягум. Ань кол



З.Н. Тарлина йөнтум хораме суссылтытэ

китыт накёт, экспозиционный колнакёт, сосса мәхум маснутыл мастым манекеныг ләвнэ утыт лйөлөгыт, сагагум акв хотты ут палт састлыягум. Игошев ойка картинанэт мәньщи мәхум пөслыс, ань та колнакт төва хуриянэ колнор онтсыл нөх-вәрим өлэгыт. «Төрүм Маа» музейт хультуптан мәгыс өс акв тамле сагыг вәрөгум, ань тай вәглум, хумус рүпитаңкве эри.

Пёс мәхманув өщнут

Мәньщи нэ **Светлана Михайловна Астапович** нэ хөтпат ләгыл маснут сакныл хорамтаңкве ханищтасанэ. Та өщнутув ань хурит пөслым өлы, рущ щирыл тапочка ләваве, Ас мәньщиянув ләвөгыт – ниры. Светлана Михайловна потыртас:

– Тамле ләгыл маснут ам мәщтыр нэ Зоя Никифоровна Лозямова палт кәсаласум. Төнт номылматсум, ам өс тамле нирыг өньщункве таңхөгум. Таве китыгласлүм, ты ләгыл маснут аман хумус йөнтаве, аном вос ханищтытэ. Нэ ләвыс, ты Ас мәхум тән пёс порат тамле нирыт өщсыт, акв хотты нэпакыт кәсаластэ, тувле сунсым йиныс, тувыл йөнтыстэ ос сакыл хорамтастэ.

Ам хунь ты тэла палт вуйхатасум, нэпакыт ловиньятаңкве патсум. Аквмат сунсэгум, хансым өлы:

– Тамле нирыт Посал пәвылт өлум мәньщи мәхум тән өщсыт.

Ам рүтанум пуссын тувыл өлэгыт. Төнт номылматсум, пёс порат мәхманум насати тамле



С.А. Харитоновна сагыг суссылты



Атын вәрнэ хорам

маснутыл ёмыгтасыт, тащиңк таимāгыс тамле тапочкаг юнтуңкве тах-маясум.

Ань нэкет ос агири-щит ам ётум татем юнс-хатэгыт, сусёмт, тана-нылн пумыщ тамле ватал тэла воруңкве - лагыл маснут сакыл хорамтаң-кве. Номсэгум, пёс мах-манум тэланыл мощ ос олы, маньлат хотпатн элалы тотаве.

Пуңкын пиннэ хорам

Ханты нэ **Зоя Никоновна Тарлина** Касум павылныл ёхталас, тав пуңкын пиннэ хорам ос атын вэрнэ нуй торлөмт палт сакыт юнтыс. Нэ тох лавыс:

– Ам ань пуңкын пиннэ хорам вэрэгум, руц щирыл ободокыг лававе. Нуми палэ янытэ сакыл юнтыслум, ань ос пальтытаге торыг ёлалы ханашлан хорамытыл нётылум. Ты сака пёс йис пормас, сосса махманув пёс порат тох мащтырласыт. Ань ос кос варавет, эргын ос ййквнэ порат нётылтахтын магыс пуңкын пинтлавет. Ты семинарыт ман пормасанув пёс щирыл щёпитыянув, хосат сосса нэкет хумус щаквщисыт, тох вэрёв.

Ам пёс тэлат овылтыт акваг пумшалахтэгум, матыр-ати катыл вэрэгум.



Я.Н. Тарлин сыпаль вэри

Ты элы-палт атын вэрнэ нуй торлөмт палт сакыт юнтсум. Хорам хумус эри воруңкве, мащтыр нэковён Сенгепова Светлана Михайловнан хултыглавёсум. Тамле хорам ат вэрыгласум, таимāгыс тув та вуйхаталсум.

Ань йис ханты агиянув супаныл яныг хорамыл юнтыяныл, савсыр сакыл вэрияныл, шар нас сургёгыт, вольгёгыт, элыл нэңкёгыт. Элнаң сак сав хунь олыс, яңк ос сэмыл сактай катын-патталасыт, туп кит ман хурум савсыр сакыт маснутаныл-пормасаныл палт юнтыгласыт.

Матъемас тамле ханищтапыт вэрыглавет, ман, сосса махум, акван-

хонтхатыглалэв, хотьют маныр вэг, потырты, ныврамыт ханищтыянув, манти ос матыр-ати тэрапаттэв. Мөлты тыт ам сасныл апа юнтсум, музейт хулислум, ань сунсэгум, апам выставкат унлы, номтум татем ёмас.

– **Зоя Никоновна, наң апа юнтуңкве хот ханищтахтасын?**

– Омам ос анёквам апат, пайпыт, сөвтыт, савсыр хусапсовыт ос анысаныт юнтыгласыг. Вөрн маньтагыл ялантасув, пил ватсув, касынув такви сөвт оныщас, яныгхотпанув ёт сыс пайп вуйласыт.

Сасныл матыр юнтуңкве ам сака эруптэгум, ты ос пумыщ тэла. Ёмас, састум саслөмт катын-паттуңкве тай сака рупатаң. Касум павлуvt «Народный мастер России» намыл маим нэ Аксинья Григорьевна Ерныхова олы, манав тав ты ханищтытэ, потырты, сас магыс вөрн хунь ялуңкве эри, манхурип халь кинсуңкве, хоты нупыл минуңкве эри, пуссын хултыгылы. Сас магыс вөрн туг ман таквсы ялантаңкве эри. Вөрн минэв, сас атэв, тувыл лямийив нир яктэв, ульпа тэр кинсэв. Юн



Л.Д. Старкова юнхсхаты

ос сас хальптэв, апат ос хусапсовыт юнтэв, хансал щуртыянув.

Зоя Никоновна ойкатэ **Яков Никифорович Тарлин** катыл савсыр пормасыт вэри, 2006 талт «Народный мастер России» намыл майвес. Хум лавыс, овыл касеа вэрме порат 21 тэлэ төвлыс, тонт армияныл ущ ёхтыс. Та пасныл касайт, сыпалит, энтапыт ос мот сав эрнэ пормасыт вэри, тувыл тыналыяна. Яков Никифорович тамле оцхулиң хум, мовиньтым лави, тох сакати нянвинэ оln катн-патталы.

Суп тайт хорам

Октябрьский район Шеркалы павылныл **Лидия Дмитриевна Старкова** ёхталас. Ханищтап урыл нэ щэгтым лавыс:

– Ам суп тайт хорамыг юнтсум, ань ос сакыл вэриягум. Акв парам ты астылым, тыт хульгуптыягум, юн тах ос щаквщункве унтсэгум. Тыт сака ёмас махумавет рупитэгыт. Муй махум, каркам хотпат сав тэла вагыт, мащтырлаңкве хасэгыт, маньлат хотпат ханищтэгыт.

Светлана
РОМБАНДЕЕВА



С.М. Астапович щаквщим унлы

Пёс порат ӧньщим сагыт урыл

Ань мӧньлат хӧтпат пёс порат ӧлум накыт тӧра-паттуҗке тахмаёгыт ке, тӧн ханищтапыт вӧрыглӧгыт. Яныгпӧлаг ӧлнӧ хӧтпанув тӧн ӧтаныл ос ищхйпыҗ ут хосыт потыртаҗке ханищтахтасыт.

Мӧлалнув «Торум Маа» нампа музейт рупитан нӧ **Дарья Кунина** ханищтап вӧрыглас, тувыл сосса мӧхманув саг сагнӧ тӧлат урыл потыртаҗке вӧвыглӧлсанӧ. Тӧнт округувныл сӧвсыр ӧсытт, районьтт ӧлнӧ сосса мӧхманув ос Ямал мӧныл ты ханищтап ӧс суссыт.

Ӗвыл лӧтыҗ история наука кандидатьг ӧлнӧ нӧн **Татьяна Александровна Молданован** лӧвыс. Тав ӧлумхӧлас ӧтанӧ урыл ос хумус пёс порат сагыт вӧрвӧсыт, пуссын ты тӧлат ханищтасанӧ ос мӧнавн потыртас.

Пёс мӧхманув лӧвыгласыт, ӧлумхӧлас ӧтанӧт ӧре ӧлы. Мӧньщи ос

ханты мӧхманув пёс йис тӧгыл тамле нак ӧщсыт, самын патум нӧврам пуҗке мохлаве, та юи-пӧлт Нӧй-Ӗтыранӧн ӧргалым ӧньщунҗке патаве тах. Мӧт пёс нак вӧрнӧныл порат ӧлумхӧлас ӧтанӧ щирьл хотталы щалтум хӧтпатӧн матыр хултуҗке вӧрму-вес.

Мӧньщит ос ханты пуҗканыл ос ӧтаныл ӧргалӧлнӧ мӧгыс сагыл сагыглавӧсыт. Ты ӧти нас сагыг, ӧвлӧт ӧтыт котлӧныл киттыг тӧрамтыяныл, тувыл саг квӧлгыг сагавег, руц щирьл тӧн «накосникыг» лӧвавет. Тув сӧвсыр кӧр лӧквыт тагатавет, тох ӧлумхӧлас ӧмщакв ӧргалаҗке



Тамле кӧрыт сагын тагатавет

патаве. Манасӧвит кӧр лӧкв вӧри, та щирьл тав та ӧргалаве.

Татьяна Александровна ханты ос мӧньщит манхурип саг ӧщсыт, аквхурипаг сусхатасыт манос ӧти, та урыл аквик лӧтыҗ лӧвыс. Сосса мӧхманув саганыл хӧрум щирьл лӧкква-уртвӧсыт, руц щирьл лӧвуҗке ке, тыи: южный, восточный ос северный.

Тӧнаныл хултыглан порат сыре-сыр хурил суссылтавесӧв. Мӧт хӧн мӧт мӧт мирыт ӧтаныл хумус сагим ӧщсаныл, таит ӧс тӧра-паттысанӧв. Индият ос Казахстаньт ӧлнӧ мирыт ӧс тамле хурип саг ӧщмыт.

Сӧвсыр музейтт манхурип сагыт акван-атым ӧлӧгыт, Дарья Кунина та урыл ӧс потыртас. Учӧныт урыл тав тох лӧвыс. Сагыт урыл Н.В. Лукина, Е.Г. Фӧдорова, А.А. Богордаева, С.А. Попова потрыт хассыт.

Надежда Лукина немецкий лӧтҗыл хансым нӧпак руц лӧтҗыл толмашластӧ. Ювле хультум кит нотыт тӧра-паттум вӧрмалит А. Алквист, У. Сирелиус, А. Каннисто, финн учӧныт, тот хансыгласыт. Ань хӧт-ӧти му-

зеитт акван-атым сагыт пуссын нӧпакн пӧслувӧсыт ос мӧн тӧнаныл ищхйпыҗ утыт хӧнтуҗке вӧрмианӧв.

Дарья Кунина Ханты-Мансийск ӧст ӧлнӧ мӧщтыр ӧква **Мария Сергеевна Мерова** ӧт мӧньщи сагыт урыл китыгламе. М.С. Мерова тавӧн потыртас:

– Ам мӧнь тӧгыл оманн ӧтанум акваг сагыл сагвӧсыт. Кит-хӧрум хӧтал мины, ӧтанув тӧрамтыянув, пуҗканув ловтыянув ӧста саг сагӧв. Юрт ӧгирищит увщиянылн ӧтаныл сагвӧсыт, тӧванакт мӧнки халанувт ӧс сагыгласӧв. Омам ӧс саг ӧньщис.

Ам хум вӧрмум порат пёс сагыг ӧнумн мӧйлуптасаге. Таи сӧль, та сагыг акв ӧст суссылтан порат хот-тӧлмантавесыг. Мӧн омамӧнтыл ты сагыг ӧтям номылматан мӧгыс ӧщсагмӧн, ты тав хультуптам сагыг. Омам сагыг нас туп лӧкква-тӧрамтӧлсаге, хашлум пёс тӧр лӧмтыл йильпи тӧр лӧмтыл вӧрыгласаге ос пёс щӧлыголн кӧранӧ ювле тув вӧрсанӧ.

Ханты сагыт урыл Ямал мӧныл ӧлнӧ нӧг потыртасыг. Ханты-Мужи пӧвылт ӧлнӧ «Живун»



Татьяна Мерова сагыл сагвес. Лӧпмус, 1991 тӧл



Ты сагыт Тэк павылт Е.Г. Федорова пöслысанэ



Пёс сагыт

нампа музейт рүпитан нэ Алла Васильевна Конева ты урыл потыртас, тән музейнылт атхуйплов савит сагыт акван-атымат, тән хотьютн ос хумус вәрвёсыт, манарыл хорамта-вёсыт, таи суссылтас.

Мария Иосифовна Куртямова такви щёмьятэт öщнэ пёс сагыт суссылтанкве тотыгласаге. Ты сагыт XIX нотыт вәримаг, савсыр пёс кёрыл тагатым öлэг. Сагыт вёскалан порат тәрвитэн 20 килаг öлыс.

Тамле пүмаш вәрмалит ищхйпың ут хосыт та суссүв. Тох мәньлат агит-пыгыт савсыр тэлат пүмшалым матыр-ати вәңкве öс патсыт.

Яныгпалаг öлнэ хөтпанув пёс накыт номим

мәнавн потыртасыт.

Юи-öвыл хультум тәлытыт мәхум пёс сагыл аквтох сав пүмшалахтэ-гыт. Ханты-Мансийск үст öлнэ мәньлат мәхум М.С. Мерова палт матыр китыглаңкве ёхталэгыт, тән саг сагнэ тэла кинан пöслыяныл.

Ты коньпал Хальүс район Ясунтыт «Мәнь Ускве» этностойбищат пёс тәгыл öлум ёнгиланыл мәгыс агирищит ос пыгрищит саг сагуңкве ханищтасанэ. Тувыл Белоярский үст öлнэ ханты нэ И.К. Фирсова ищхйпың ут хосыт öс ханищтап вәрыглы.

Тамара
МЕРОВА

Сәңквылтапыл сәңквылтаңкве ханищтавёсыт

Ты этпос 4-6 хөталытт Ханты-Мансийск үст округ творчество колт ханищтап öлыс. Тот мәщтырлан хум Анатолий Вадичупов сәңквылтапыт вәруңкве ос ханты хум Алексей Рещиков сәңквылтаңкве мәхум ханищтасыг.

Това хөтпат ты вәрмалы ищхйпың ут хосыт Ямало-Ненецкий округныл суссыт. Хальүс район Ягрим павылт öлнэ ханты хум Василий Кузьмич Аксёнов тув öс вöвиньтәлвес.

Тав ты семинарн пёс сәңквылтап ёт-тотыглас-стэ. Таве яныгсәт арыгтем тәл үргалым щёмьянылт öнщияныл. Мәхум ты пёс ёнгын утыл сака пүмшалахтасыт ос мощ ёнгуңкве әрталыхтасыт.

Яныгпала хөтпа ханты ос мәньщи ләтңыл ём-

щакв потырты. Такви öс сака ёмщакв сәңквылтаңкв хәсы. Ханты ләтңыл такви хансум эрганэ эргиянэ. Ойка «Мансын ойка», «Сöвыр койнэ тән» ос мөт пёс йис тәныт ёмщакв вәганэ. Такви сәңквылтапыт öс мәщтырлы. Ань öлум семинарт тав такви нётнэ тәнанэ мощ сәңквылтас.

Василий Кузьмич 1936 тәлт Тәгт я вәтат самын патыс. Тав әтятэ хөнтлум мән тотвес, воссыг юв ат ёхтыс, хотты мәт вәнэтәл та хультыс. Оматэ таккөт



Ищхйпың мәлғым хури

А. Вадичупов нэ ханищты

нәврамыт янмалтасанэ.

Василий Кузьмич мәньтәгыл хул алыщлым ос вбраим яласас. Ты мәщтыр хум мәнхәпыт, тупыт, ёсат, матыр-ати пуссын такви вәри. 2002 тәл пәсныл пенсия-олн вуим öлы.

Ань öлум семинарт мүй мәхум **Алексей Рещиков** сәңквылтаңкве ханищтасанэ. Тав тәна-ныл хурум группа щирыл ләкква-уртсанэ. Кәсың

хөтпа ёт янас рүпитас. Ёты-öвылт төва хөтпат ёнгын тәныт ёмщакв ханищтасаныл.

Мәньщи хум **Анатолий Вадичупов** мәхумн ос потыртас, манхурип йивныл ос хумус сәңквылтап вәруңкве эри, хумус эрнэ щирыл ёргуңкв эри, таи хултыс. Ты ханищтап нән округ творчество кол ищхйпың ут лөпсәт сунсуңкве вөрмилбын.

Николай МЕРОВ

Сақв я ватат үнлын ялпыңкол

Хальүс район Саранпавылт Казанский икона Божией Матери щирыл намаим Православный храм – ялпыңкол ҕлы. Тот рүпитан нэ Ирина Александровна Журавлёва ты кол тэланэ урыл мощ потыртас.

– Ты ялпыңколт ам Воскресный школа тармыл пуңктотэҕум, Төрүм ащув Өвылтыт потыртэҕум. Нэпак ловиньтан колнак Өныщёв, янге-мәне ёхталэҕыт, нэпакыл майлыянуу, тувыл иконат ос мот пормасыт тыналан лавкат рүпитэҕум.

Павлувт ты ялпыңколув 1996 талт үнттуңкве номылматвес. Та порат Анна Георгиевна Рочева Тобольск үсн ялыс, тот рүпитан Батюшка Өйка тав нуллэ лавыс, Саранпавылт ялпыңкол вос үнттынуве. Нэ юв ёхтыс, павыл мир ёт сапрәни вәрыс, ты ляххал урыл потыртас, махум тав ётэ кәсашасыт.

Александра Алексеевна Артеева лавыс, оматэ пёс колт вос атхатыҕлэҕыт, тот пёрна пос вос пинэҕыт, исвещат вос пёламтэҕыт. Сав тал та колт атхатыҕласув, ётыл мир-

кол пәлыл йильпи ялпыңколыл үнттувесув, 2015 тал порат тыг вантлысув.

1997 талт Александра Егоровна Рокина, Николай Никитович Артеев ос мот махум ялпыңкол тох намаясаныл: **Храм Казанской иконы Божией Матери.** Сав ёмас тэла вәрыс Фёдор Афанасьевич Филиппов – та пёс колув колалатэ пүврыг вәрыстэ, Өлпыл сартыстэ, Иисус Христос ос Библия нэпакныл сунсым савсыр хурит пёслыс.

Николай Геннадьевич Полуянов кол үнттын маҕыс олн майлас. Михаил Назаров хурүм лөңханьщәпыт вәрылтас, хум такви ойтхатас. Тән ань кон ханэҕыт, суй вәрнэ маҕыс Даша аҕирищин квәлгыл хасумтәлавет.

Усик Маркосян ялпыңколувн «Неупиваемая чаша» наппа икона ёв-



Саранпавылт ялпыңкол

тыс. Ты сака тының хури, Тобольск үст вәрвес. Ты хури элы-пәлт мән пёрнапос пинэв, пөйкщёв, ань павылт Өлнэ махманув пус кәт, пус ләгыл вос ёмыгтэҕыт. Ёмас тэла вәрыглам махум төваныл ань атимыт, мән пуссын ёмас ләтңыл номылматәлыянув, кәстыянув, тән маҕсыланыл пёрнапос пинэв.

Саранпавылт ялпыңколт Өвлэт Феодор Савельев рүпитас, хум Пыть-Ях үсныл Өлыс. Мәнавн тав исвещат туштын маҕыс аныт ос мот эрнэ пормасыт тотыглас,

павыл махум пёрнапосыл пинсанэ. Няврамыт маҕыс Пыть-Ях үст Православный лагерь вәрыглас, Саранпавылт няврамыт тув үщлахтуңкве ялантасыт. Молты порат хум атимыг ёмтыс.

Сергий Белоцерковский павлувн вәтихал ёхталас. Тав Өс махум пёрнапосыл пинсанэ (Сакв ят), Төрүм ащув Өвылтыт потыртас.

2017 талт ялпыңколувн Алексей Васильев патхатыглас. Хум тыт хурүм тал рүпитас, сав эрнэ тэлат вәрыс. Ётыл Тюмень үсн вөввес, тув Өлмыглас.

Нина Дмитриевна Хатанзеева Югорск үсн кётыглавес, тот церковный эргыт эргункве ханищтахтас. Ань эргын хор Өныщёв, янге-мәне тот эргёҕыт.

Ирина Александровна лавыс, ялпыңколанылн сав хөтпа ёхталэҕыт, пуссын аквьёт тән элы хөтал урыл пөйкщёҕыт, павыл махманыл пустаҕыл вос Өлэҕыт, Төрүм ащувн вос үргалавет.



И.А. Журавлёва



Даша Зайкина

Тэк павылныл олум учёный хөтпа



М.А. Лапина, 2010-ит тәлытт

Молтынув Ханты-Мансийск үст блнэ «Төрүм Маа» музейт ханты учёный нэ урыл «Маина Лапина. Жизнь в науке» нампа суссылтап вәрыглавес. Ты нэ блыске, яңк нәтнэ этпос вәт хөталәт 70 тәлэ төвлынув. Ос 2017 тәлт ойттүр этпост пувласпи-агм паттатәт әтимыг ёмтыс.

Ань М.А. Лапина кәстыглан мәгыс музейн тав етә рүпитам мәхум, Тэк павылт блнэ хөтпат, юртанэ ос рүтанэ акван-атхатыгласыт. Тән тот сәвсыр хурит, пормасыт ос наука мәгыс хансум нэпаканэ кәсаласаныл, тувыл төва пүмыщ блыглам накыт номылматыгласыт.

Колтаглә урыл

Маина Афанасьевна Лапина Тэк павылт самын патыс, такви әги бәрищ наме Неттина блыс. Ты Неттин рүт колтагыл

мәхум пусмалтан ос нәйт хөтпаг ләвыглавёсыт, тувыл матыр тәлат хүлтыглан ос тәра-паттын щирыл бс тән палтаныл акваг ёхталасыт.

Тән бәрищ намыл «нәтты ёх» ханты ләтңыл ләввес, ос мәньщи ләтңыг «нәтнэ мәхум» толмащлахты. Тэк павылт блнэ мәхум пуссын вәсыт, тән павлың Нәй-Отыраныл ты Неттин колтагылн үргалавес.

Тамле сөтың щәмьят Маина Неттина та яныгмас ос мәнь тагыл мутраң тәлатн ханищтавес.

Олмәт, пуссын номтанэ наука щирыл элаль тотсанэ.

Школа әстламе юипәлт тав Салехард үст хультпросветучилищат ханищтахтас. Овләт тав матахмат тәл Ямал мәт культура тармыл рүпитас, тувыл 1990-ит тәлыт порат округувн ювле ёхтыс. Тыт Ханты-Мансийск үст сәв мирыт культура тәланыл колт пуңкотнэ нәг паттыглавес.

Наука рүпата вәрыс

Ётыл соссә мәхум пәс накыт нөх-вөрмалтан щирыл наука рүпитаңкве патыс. 1991 тәлныл 2010 тәл мус Маина Афанасьевна Әс-угорский мәхум институтт рүпитас. Тот ханты мәхум пәс накыт ханищтым матыр-әти тәра-паттыс. Такви рүпататә коньпал тав мәньлат хөтпат ханищтасанэ, аквәёт соссә мәхум блнэ мәнь павлың мән ялсыт.

1997 тәлт Маина Лапина «Традиционная

хантыйская этика» диссертация нэпак әстластә ос история наука кандидат намыл майвес. Та юипәлт 1998 тәлт «Этика и этикет ханты» пүмаш нэпаке тәратавес.

Ётылнув, 2000-2002 тәлытт, Маина Лапина ты институт күщаиг блыс. Тав мәньлат ханты хөтпатн диссертация хансуңкве нәтыс. Россият блнэ этнографыт, историкыт ос мөт хөн мәныл блнэ учёныит ёт, акван-нәтхатым матыр-ати тәра-паттысыт. Хумус аквәёт рүпитасыт, маныр тәлатн ханищтавёсыт, ты бөвләт музейн ёхталам мүй мәхум ань потыртасыт.

Тав урәт сәв сымың ләтың Евдокия Андреевна Нёмысова ос Татьяна Владимировна Волдина, Раиса Германовна Решетникова ләвсыт. Школа искусств колт рүпитан нэ Наталья Юрьевна Сайнакова потыртас, хумус тав Маина Афанасьевна соссә нәврамыт ёт рүпитаңкве, манарыл пүмшалаңкве хүлтыстә. Төнт ты тав хүл совныл пормасыт вәруңкве патыс.

Тэк павылныл блнэ хум Алексей Решиков эргыт эргын ос ййквыт ханищтан тәлат урыл потыртас. Ты вәрмалит ханищтаме порат тав акваг М.А. Лапинан нәтвес. Тувыл Алексей «Мелодия девушек из деревни Теги» эрыгсов тән сәңквилтас.

Тамара МЕРОВА



Лүймә сәрипос
(Северная заря)
№11 (1245), 10.06.2021
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Врио директора, гл. редактор –
Кондина Г.Р.
Телефон (3467) 33-36-82
Заместитель гл. редактора –
Кондина Г.Р.
Телефон (3467) 33-36-82
Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52
E-mail: gazeta@khanty-yasang.ru
Газета размещена на сайте
www.khanty-yasang.ru
Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399
Тираж 1710 экз.
Заказ 2325
Цена свободная
Мнение авторов
публикаций не
обязательно отражает
точку зрения редакции.
Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.
Свидетельство
о регистрации
ПИ №ТУ 72-00795
от 23 января 2013 г.

Морах тәрсыт мән үнттувёсыт



Агит-пыгыт морах үнттуңкве ёхталасыт

Наталья Николаевна Чайникова Ханты-Мансийск үс ляпат ёлнэ пёрма кўщайг рўпиты. Та мātēt, яңкылмат, сāvсыр пил тārсыт үнтты. Това пилыт ань ёмщакв элаль яныгмёгыт. Ётыл ты пилыт элаль тәнки сāvмёгыт. Ты вәрмаль урыл нэ а́нумн ань мощ потыртас.

Яңк нātнэ этпос оигпан порат Наталья Николаевна яңкылматēt морах тārсыт үнттыс. Ты кастыл тәннут-пормас тыналан мāt кўщайг рўпитан хōтпат, ляххал тотнэ мāхум ос мā-вит ургалаңкв ханищтахтын агит-пыгыт тавен нётуңкве тув ёхталасыт.

Кўщай нэ пилыт хосат

тāгыл үнттуңкве номыл-матас. Щар ёвил порат Кострома үст мāхум пилыт тәнки янмалтаңкве патсыт. Нэ ты вәрмаль ханищтан мāгыс тув ялыс. Тот учёный хōтпат лүймāt яныгман пилыт тәнки янмалтёгыт.

Наталья Николаевна пил янмалтан тэла тот ёмщакв тара-паттыстэ, ос

хўрум тāl ювле хультум порат такви йис мātēt саңквлыпил, сўйпил, ежевика, тāхт ос морах пилыт үнттыс. Ты пилыт ань ёмщакв элаль яныгмёгыт.

Ты вәрмаль элаль тотнэ мāгыс пёрма кўщай нэ сāv эрнэ рўпата вāрыс. Ёвлэт та мātэ, яңкылматэ, порсыл ос патыглам ййвытныл ёмщакв хотсыстамтастэ. Тувыл яңкылма хот ул вос тōсыс, мувлахил вит атхатнэ хулыл вārвес. Ань та мāt вит акваг ёлы. Тав номсыс, эрың лүймāt ты пил тārсыт яныгмаңкве ат патёгыт. Ос тох ёмтыс, ань тот сāv пил яныгми.

Наталья Николаевна ты тāl яңкылматēt мāхум ёт иң акв сōтыра савит морах тārсыт үнттыс. Ань тот пуссын акваёт вāt нупыл кит сōтыра савиткем морах тārс яныгми. Ёвил тāлытыт тән лўпта-ныл нас нōх-тэлёгыт. Яңкылмат лўпта тārсаныл ёмщакв тāрамлэгыт, та юи-пāлт ущта пилыт яныгмаңкве патёгыт.

2018 тāлт үнттум саңквлыпиланыл ань ёмщакв яныгмёгыт. Тāнаныл үнттуңкве ань ёс ат эри, тән

тāнкирот ты сāvмысыт. Ань тот сāv пил вātуңкве рōви. Ос ёмас вәрмаль ёлы, ты тārсытныл кāсың тāl сāvнув пил яныгми.

Ань ты пёрмат рўпитан хōтпат сāv пил атёгыт ос элаль тыналёгыт. Округувт ты пилытныл сāvсыр мāг пāнкат, атың айнэ витыт, канпёткат ос мōт атың тәннутыт вāравет. Хультум пилыт ёс тох эл тыналавет.

Наталья Николаевна лāvме щирыл, пил вātнэ порат кāсың хōтпа тув ёхталаңкве вёрми. Тот элумхōлас кит ветра вāты ке, акв ветратэ таквинā-тән юв виңкве вёрмитэ, мōт ветратэ ос пёрмат хультуптаңкве эри.

Мōлты тāl ты пил янмалтан мән округ кўщай нэ Наталья Комарова ёхталас. Тав тот яныгман атың пилыт арталасанэ ос пил янмалтан хōтпат ты ёмас тэла вārнэныл мāгыс сака янытласанэ. Ань округувт кāсащан хōтпат тамле пилыт тәнки янмалтаңкве ёс вёрмёгыт.

Николай МЕРОВ



Саңквлыпил тārсыт үнттувёсыт



Морах пилыт яныгмасыт